

四庫全書

經部

欽定四庫全書

經部
春秋左傳補註卷一
三

詳校官監察御史_臣查善長

給事中_臣溫常綬履勘

總校官知縣_臣繆琪

校對官主事_臣陳文樞

謄錄監生_臣梁鳴岐

欽定四庫全書

經部五

左傳補注

春秋類

提要

臣等謹按左傳補注六卷

國朝惠棟撰棟有周易述已覺錄是書皆援引
舊訓以補杜預左傳集解之遺本所作九經
古義之一以先出別行故九經古義刊本虛
列其目而無書目作四卷此本實六卷則後

又有所增益也其中最典確者如隱五年則公不射引周禮射人祭祀則贊射牲司弓矢供射牲之弓矢及國語倚相之言證旁引射

蛟之誤

案此朱子之說非杜註也蓋因補杜而類及之

莊公十四年

繩息媯引呂覽周公作詩以繩文王之德表

記鄭注譽繩也證杜注訓譽之由二十八年

臧孫辰告糴于齊禮也引周書糴匡篇年儉

穀不足君親巡方卿告糴證為古禮僖五年

虞不臘矣引太平御覽舊注及風俗通月令
章句證臘不始秦十年七輿大夫引王肅詩
傳證七當作五二十二年大司馬固諫曰引
晉語公子過宋與司馬公孫固相善證固為
人名二十七年夏書曰引墨子明鬼篇證尚
書但有夏書商書周書本無虞書文十八年
在九刑不忘引周書嘗麥解證為刑書九篇
宣二年以視於朝引毛詩鹿鳴箋儀禮士昏

禮注證視為正字郭忠恕作示為誤三年不
逢不若引郭璞爾雅注作禁禦不若證以杜
注逢字在下文知今本訛寫六年以盈其貫
引韓非子以我滿貫證貫字成十六年徹七
札馬引呂覽愛士篇證鄭康成一甲七札之
說襄二十三年娶于鑄引樂記鄭注證鑄即
祝國又踞轉而鼓琴引許慎淮南子注證轉
即軫二十五年慎始而敬終以不困引周書

常訓解證不出古文蔡仲之命二十七年
崔杼生成及彊而寡引墨子辭過篇證無妻
曰寡昭元年具五獻之遵豆於幕下引禮記
正義證杜註五獻之誤十五年一歲而有三
年之喪二引墨子公孟非儒二篇證妻喪三
年為春秋末造之禮十六年鑿而乘于他車
引說文證鑿誤作鑿二十五年襪而登席引
少儀證燕必解襪皆根據昭然不同臆揣至

文二年廢六關引公羊傳注證廢訓置則是
又引韋昭國語注證置訓廢則非蓋置有二
義一為建置之置公羊注所言是也一為棄
置之置國語注所言是也此猶亂可訓治而
亂離瘼矣不可訓治臭可訓香而逐臭之夫
不可訓香古之設關在譏而不在征臧文仲
廢六關以博寬大之譽而使姦究莫詰陰以
厲民故誅其心而謂之不仁棟但執反覆旁

通之義殊為偏駁又文十四年其處者為劉氏孔穎達疏明言漢儒加此一句則為劉氏無疑而必謂原作留字漢儒改為卯金刀宣二年文馬百馬當以邱光庭兼明書所辨為是而必引說文畫馬之訓成十七年澤門之哲謂古臯澤字通又謂諸侯有臯門其說固是然邑中澤門各指所居臯門非所居之地也二十一年公姑姊既謂註疏皆非斷為同

宗之女然于姑可解于姊終無解也二十五
年執簡而往引服虔說一簡八字證太史書
崔杼事亦八字殊嫌牽合三十年亥有二首
六身即指為孟子之亥唐尤為附會昭七年
余敢忘高圉亞圉引竹書紀年補杜預之闕
不知汲郡古文預所目睹預既不引知原書
必無此文表可以後來偽本證其疏漏

崇書
中屢

引竹書紀年蓋未
及詳考今本之偽

至于二十五年鄭翮願為

鶴引陸佃埤雅之雜說

案鶴井出西陽雜俎非始于佃

哀六

年無疾而死引汲冢瑣語之野談十二年效
夷言謂春秋時已重吳音不始于晉更非注
經之體矣他如公即位之位必欲從古經作
立屢豐年之屢必欲從說文作婁亦皆徒駭
耳目不可施行蓋其長在博其短亦在于嗜
博其長在古其短亦在于泥古也乾隆四十
六年十一月恭校上

總纂官臣紀昀陸錫熊臣孫士毅

總校官臣陸費墀

欽定四庫全書

春秋左傳補註卷一

元和惠棟撰

棟曾王父樸菴先生幼通左氏春秋至耄不衰常因杜氏之未備者作補註一卷傳序相授於今四世矣竊謂春秋三傳左氏先著竹帛名為古學故所載古文為多晉宋以來鄭賈之學漸微而服杜盛行及孔穎達奉勅為春秋正義又專為杜氏一家之學值五代之亂服氏

遂亡嘗見鄭康成之周禮韋宏嗣之國語純采先儒之說末乃下以己意令讀者可以考得失而審異同自杜元凱為春秋集解雖根本前修而不著其說又其持論間與諸儒相違於是樂遜序義劉炫規過之書出焉棟少習是書長聞庭訓每謂杜氏解經頗多違誤因刺取經傳附以先世遺聞廣為補註六卷用以博異說祛俗議宗韋鄭之遺前修不揜效樂劉之意有失必規其中於古今文之同異者尤悉焉傳之子孫俾知四世之業

勿替引之云爾戊戌冬日東吳惠棟定字序

隱元年經公及邾儀父盟于蔑 蔑本姑蔑定十二年
傳費人北國人追之敗諸姑蔑是也隱公名息姑而
當時史官為之諱猶定公名宋哀廿四年傳宗人釁
夏曰孝惠取于商不云宋也古人舍故諱新故哀為
定諱定不為隱諱汲郡古文云魯隱公及邾莊公盟
于姑蔑魏史不為魯諱則此經為隱諱明矣

傳都城過百雉國之害也 管子曰國小而都大者弑

先王之制大都不過參國之一中五之一小九之一

周書作雒云大縣城方王城三之一小縣立城方王城九之一不舉中者從可知此周公相成王作雒所定之制故云先王之制

公入而賦大隧之中 徐齊民北征記曰苑陵縣東南有大隧澗鄭莊公所闕

其樂也融融 融古文作彤張衡思玄賦展洩洩而彤彤舊注云洩洩彤彤皆和貌李善云左傳曰鄭莊公

入而賦大隧之中其樂也彤彤融與彤古字通

案穀
阮碑

陰亦以
彤為融

注不皆與今說詩者同 余仁仲左傳字辨曰不皆與

今說詩者同不皆相臺岳氏本作皆不誤也

贈死不及尸弔生不及哀注諸侯已上既葬則衰麻除

無哭位諒闇終喪 樸菴子惠子曰荀卿云貨財曰

賻輿馬曰賵衣死也送死不及柩尸弔生不及悲哀

非禮也贈弔及事禮之大也荀卿所稱乃時王之禮

故左氏依以為說杜元凱遂借以文其短喪之說誕之甚妄之甚

衛侯來會葬注諸侯會葬非禮也 諸侯五月同盟至先王之禮也杜以卅年傳文為據明同盟惟大夫有是理乎棟聞諸家君云

二年傳脩惠公之好 兩國有前好而會盟者謂之脩好亦謂之尋高誘戰國策注曰溫故曰脩溫亦訓尋禮記中庸溫故而知新鄭注云溫讀如尋溫之溫亦作

煬
哀十二年傳云若可尋也亦可寒也賈陸曰尋溫
也是尋與脩其義一爾

三年經春王二月己巳日有食之 隋志曰推合己巳
朔

傳且夫賤妨貴少陵長遠間親新聞舊小加大淫破義
所謂六逆也君義臣行父慈子孝兄愛弟敬所謂六
順也 子惠子曰此所據古亦云然而柳子厚有駁
六逆之說蓋唐以來始有不信古者棟案管子五輔

篇曰聖王飭八禮以道民八者各得其義則為人君者中正而無私為人臣者忠信而不黨為人父者慈惠以教為人子者孝弟以肅為人兄者寬裕以誨為人弟者比順以敬為人夫者敦懜

與厯同

以固為人妻

者勸勉以貞夫然則下不倍上臣不殺

音裁

君賤不踰

貴少不陵長遠不間親新不間舊小不加大淫不破

義凡此八者禮之經也周語富辰亦云夫禮新不間

舊則八禮之說古矣石碣止舉六者禮諫有五風諫

為上厝為君陳古義倍殺之事非所宜言又公方暱
嬖人夫婦之際所宜深諱是純臣之義也

四年傳敝邑以賦 服虔曰賦兵也以田賦出兵故謂
之賦正謂以兵從也朱子注論語用其說

五年傳則公不射 此指祭祀射牲夏官射人云祭祀
則贊射牲司弓矢共射牲之弓矢外傳左史倚相曰
天子禘郊之事必自射其牲諸侯宗廟之事必自射
其牛剡羊繫豕是也朱子據傳曰則君不射是以弓

矢射魚如漢親射蛟江中之類恐未然

鄭人侵衛牧 詩靜女云自牧歸荑王質以為即春秋

之牧邑

邲人侵衛注東平剛父縣西南有邲鄉 羅革曰郡有

剛縣晉為東平國之剛平無剛父棟案京相璠春秋
土地名曰東郡廩丘縣南三十里有故邲都

使曼伯與子元潛軍軍其後 案荀子議兵篇曰王者

不屠城不潛軍不留衆潛軍之法公羊所謂詐戰非

偏戰也

六年經鄭人來渝平注渝變也 案渝讀為輸二傳作

輸廣雅曰輸更也與懌俊改同釋秦詛楚文變輸盟
刺謂變更盟刺耳渝更也平成也故經書渝平傳曰

更成杜注自明而獨訓渝為變必俗儒傳寫之譌服
虔曰公為鄭所獲釋而不結平於是更為約束以結

之故曰渝平是服亦訓渝為更

桓元年渝盟乃訓為
變古文渝輸通此經

輸作渝乃古
文之僅存者

納諸鄂注鄂晉別邑

案世本居篇云唐叔虞居鄂宋

忠曰鄂地今在大夏

釋例云晉大鹵大原大夏參虛
五名然則大夏即晉地故杜以

為晉
別邑

七年傳歆如忘

說文引云歆而忘服虔曰如而也臨

歆而忘其盟載之辭古如而皆通用莊七年經夜中

星隕如雨昭六年傳大如象之皆讀為而

八年傳因生以賜姓

王充曰因其所生賜之姓也若

夏吞薏苡而生則姓苡氏商吞燕子而生則姓子氏

周履大人跡則姓姬氏

十年傳以王命討不庭 尔疋釋詁庭直也謂諸侯之不直者

十一年傳爭長 服虔曰爭長先登受玉

工則度之 尔疋釋器木謂之度亦作剡廣雅云剡分也

桓元年經公即位 鄭衆曰古文春秋經公即位為公即立云古位立同字也棟案古鼎銘位皆作立

見朱氏彙

尊吉金

貞石志

傳目逆而送之 服虔曰目者極視精不轉也

二年經孔父注孔父稱名者內不能治其閨門外取怨於民身死而禍及其君 棟案孔父孔子之先也傳云孔父嘉為司馬是嘉名孔父字古人稱名字皆先字而後名蔡仲足是也鄭有子孔名嘉說文曰孔从乙从子乙請子之鳥也乙至而得子嘉美之也古人名嘉字子孔說文此訓蓋指宋鄭兩大夫故先儒皆

謂善孔父而書字杜輒為異說不可從也

傳立華氏也立立證周法也立華氏為證乃佐成孔

父之罪下文所云是也言桓公受賕枉法

顰厲游纓游李善引作旂顏籀同以為當从偃聲案

說文無旂字有游字云旌旗之流从旂旂聲旂與泗

同上形下聲不當音偃顏說非也蔡邕石經論語子

游之游亦作旂旂當从旂旂省聲游與旌旗字皆在

旂部从本音偃故子游名偃

惠之二十四年唐石經廿四年下惠之三十年唐石經
卅年 棟案石經凡經傳中二十字皆作廿三十字
皆作卅此古文春秋左氏傳本文也說文廿二十并
非三十并也古文省說文所以謂古文乃孔壁中文
也蔡邕石經論語云卅而立又云年卅而見惡焉又
云凡廿六章考工輪人云輪人為蓋部長二尺程長
倍之四尺者二十分寸之一謂之枚鄭注云故書十
與上二合為二十字鐘鼎文如秦權徹樂鼎二十字

作廿石鼓文周陽侯鐘三十字作卅此又金石文之
可為左證者今九經二十三十字皆當從石經改正
四年經渠伯糾注渠氏案渠周邑昭廿六年傳劉子
以王出次于渠注云周地然則伯糾蓋氏于邑者
五年經城祝丘司馬彪郡國志曰琅邪即邱春秋時
曰祝邱闕駟十三州記曰即祝魯之音蓋字承讀變
蔡人衛人陳人從王伐鄭服虔曰言人者時陳亂無
君則三國皆大夫也故稱人

傳蔡衛不枝 戰國策曰魏不能支高誘云支猶拒也
支與枝同項羽傳莫敢枝梧如淳曰猶枝扞也

旛動而鼓 賈逵曰旛發石一曰飛石范蠡兵法曰飛
石重十二斤為機發行二百步說文旛建大木置石
其上發以機以追敵也从从會聲詩云其旛如林三
國志太祖為發石車擊袁紹注引魏氏春秋曰以古
有矢石又傳言旛動而鼓說曰旛發石也于是造發
石車所云說者即賈侍中說也杜以旛為旃蓋本馬

融追古
文碓

注鄭志在苟免王討之非也 劉氏權衡曰此言不可
以訓於世奈之何以其解經且是使亂臣賊子喜也
何謂懼乎

六年經子同生 子惠子曰穀梁子曰疑故志之案桓
三年夫人姜氏至自齊十八年公與夫人姜氏遂如
齊始與齊侯亂中間文姜未有如齊之事而于六年
始書子同生明同為桓公子此聖人筆削之微意莊

四年冬公及齊人狩于禚齊有猗嗟之詩為莊公狩而作也其詩云展我甥兮亦嫌文姜之亂而證其為齊之甥夫子刪詩存之與書子同生一例公羊傳曰同非吾子齊侯之子也名教大閑聖人于此安得而不慎乎知此則知聖人刪定六經之意矣三傳惟穀梁得聖人之旨其真子夏之門人歟

此論始于朱子近日汪鈍翁朱

竹垞亦有論說與此畧同

傳蘧章 王符曰蚩冒生為章者王子無鈞也令尹孫

叔敖者為章之孫也遠與為同

奉牲以告 周禮充人曰碩牲則贊是也

癰蠱 說文曰瘞小腫也一曰族彙張有復古編云族
从𠂔矢昨木切彙从𠂔系力軌切別作癰癰非釋文
云癰本又作族蠱說文作瘵

嘉栗旨酒 劉光伯以栗為穗貌詩云實穎實栗

接以太牢 服虔曰接者子初生接見于父與杜異

與吾同物 物謂六物歲時日月星辰是也與桓公同

日故云同物

古稱六物
唐稱祿命

八年傳無與王遇

遇敵也戰國策曰盼子復整其士

卒與王遇高誘云遇敵也敵猶當也故少師以為不

當王

十年傳齊人餽諸侯

餽說文引作氣云饋客芻米也

十有一年經宋人執鄭祭仲注祭氏仲名不稱行人聽

迫脅以逐君罪之也

劉光伯以祭仲是字鄭人嘉

之又云祭仲本非行人棟案五年傳云祭仲足為左

拒此年傳云祭封人仲足世本載姓氏皆先字後名
此與孔父嘉一例則仲字足名確然無疑杜於五年
傳注云祭足即祭仲之字是專欲違舊法以就其曲

說劉氏規之是也

左氏無貶仲之文仲為宋所迫脅雖死無益于忽故公羊以為行權

釋例斥其挾偽以篡其君過矣

傳君多內寵 服虔曰言庶子有寵者多

雍氏宗有寵于宋 服虔曰為宋正卿故曰有寵

十二年傳坐其北門注坐猶守也 案兵法有立陳坐

陳見尉繚子立陳所以行也坐陳所以止也傳曰裹糧坐甲又云王使甲坐于道又云士皆坐列司馬法曰徒以坐固荀子曰庶士介而坐道及此傳坐其北門皆坐陳也杜訓坐為守蓋未通于古義

十三年傳舉趾高 趾漢書引作止高誘曰止足也鄭注士昏禮曰古文止作趾

賴人注賴人仕於楚者 案賴即厲也楚與國詳見後盧戎 習鑿齒曰中盧縣古盧戎也釋文作廬

莫敖縊于荒谷羣帥囚于冶父 盛宏之荊州記曰荒
谷今竹林是也又云沅陵縣東三里餘有三湖湖東
有水名長谷又西北有小城名曰冶父酈元曰湖水
東通荒谷荒谷東岸有冶父城

十六年傳使盜待諸莘 服虔曰莘衛東地京相璠曰
今平陽陽平縣北一十里有故莘亭道阨限蹊要自
衛適齊之道也

十七年傳疆場之事慎守其一 古文作畺易周禮有

置地易地呂君碑曰慎守置易蓋用此文

隸釋諱慎改為謹

說文曰置界也从畱三其界畫也或从彊土

復惡已甚矣案韓非子亦載此事復惡作報惡鄭注
大司寇云復猶報也杜訓為重失之

十八年傳齊侯通焉服虔曰旁淫曰通

莊元年傳不稱姜氏絕不為親服虔曰夫人有與殺
桓之罪絕不為親得尊父之義善莊公思大義絕有
罪故曰禮也此說與杜異案莊廿二年肆大青然後

書葬我小君文姜則服氏之說為有據矣說苑曰絕
文姜之屬而不為不愛其母正與此同屬謂不稱姜
氏也

八年傳戊葵丘 京相璠曰齊西五十里有葵邱若是
無庸戊之僖公九年齊桓會諸侯于葵邱宰孔曰齊
侯不務德而勤遠畧葵邱不在齊也胡公廣言汾陰
有葵邱或山陽西北葵城宜在此

瓜時而往曰及瓜而代 服虔曰瓜時七月及瓜謂後

年瓜時

請代弗許 尉繚子曰兵戍邊一歲遂亡不候代者法
比亡軍故二人謀作亂也

九年高傒 宰相世系表曰齊太公六世孫文公赤生
公子高孫傒為上卿與管仲合諸侯有功桓公命傒
以王父字為氏食邑於盧謚曰敬仲世為上卿敬仲
生莊子虎虎生傾子傾子生宣子固固生厚厚生子
麗子麗生止奔燕

十年經公敗宋師于棄丘注魯地 案應邵地理風俗
記曰濟陰棄氏縣故宋棄邱邑也張華博物志亦云
古棄邱杜以齊宋次于郎故指為泰山之棄邱縣但
轉戰所及棄勝逐北豈必盡屬魯地杜氏望文為義
非遂實有所據如十一年傳宋侵我公敗之鄆說文
以為宋魯間地杜則直云魯地矣

十一年傳禹湯罪已 子惠子曰禹哭罪人湯禱桑林
皆罪已之事

臧孫達 世本孝公生僖伯彊彊生哀伯達達生伯氏

瓶瓶生文仲辰此傳先載文仲之言不應後錄哀伯之語達當為辰字之誤也桓二年傳先稱臧哀伯後

云臧孫達與此一例

陸渫纂例以臧孫辰為哀伯子蓋未考世本

十二年經宋萬弑其君捷 賈逵曰公羊穀梁曰接案

捷與接古字通易晉卦曰晝日三接鄭注云接勝也

禮內則接以太牢注云接讀為捷捷勝也音義皆同

傳批而殺之 玉篇引作搃云手擊也與杜注同張有

曰攬反手擊也从手毘別作批非匹齊切

玉篇別有批字云擊

也不云

見左傳

遇太宰督于東宮之西又殺之注殺督不書宋不以告

家君曰督乃弑君之賊豈可與仇牧同書杜氏之

謬也

十四年傳大陵京相璠曰潁川臨潁縣東北二十五

里有故巨陵亭古大陵也

其氣燄以取之余仁仲左傳字辨曰其氣燄以取之

陸德明音義本云炎以音艷案王符潜夫論漢書五行志皆云其氣炎以取之釋文傳作炎注仍作𤇀尋洛誥𤇀𤇀字亦當作炎炎故杜氏引以為證揚雄解嘲炎炎者滅尚書多俗字鄭學已亡無可是正

梅福引書

云無若火始庸此今文尚書

繩息媯 呂覽四月紀曰周公旦作詩以繩文王之德孔鮒云繩之譽之也杜注本此表記曰君子不以口譽人鄭注譽繩也釋文說文作誦今說文闕廣雅云

誨譽也音繩

十有八年經春王三月日有食之 隋志曰推合壬子

朔

有蜮 服杜皆以為短狐王伯厚曰沙隨春秋例目云
有蜮或考隸古春秋作蜮蜮音特棟案蜮亦作蠚說
文云吏冥冥犯法即生螟蠚即詩之螟螣也唐公防
碑又作蠚蜮與蜮字相似呂覽任地曰大草不生又
無螟蜮高誘曰蜮作螫食心曰螟食葉曰螫兗州人

金匱要略卷之二十一
謂蟻為螻音相近也螟蟻皆害苗者故書于春秋若是短狐不須記也

傳閭敖游涌而逸 盛宏之荊州記曰江津東十餘里有中夏州州之首江之汜故屈原云經夏首而西浮夏首東二十餘里有涌口所謂閭敖遊涌而逸二水之間謂之夏州首尾七百里

十九年傳鬻拳 鄭箴膏肓曰鬻拳楚同姓

廿一年傳鄭伯享王于闕西辟 服虔曰西辟西偏也

毀敦銘云繼治我西偏東偏

廿二年傳弛於負擔 案漢碑負擔字皆作儋說文曰
儋何也从人詹聲然則負擔猶負何也

五世其昌竝于正卿 服虔曰言完後五世與卿竝列
遇觀之否 案之字義訓變漢高祖諱邦荀悅曰之字
國惠帝諱盈之字滿亦此類王充曰卜曰逢筮曰遇
尚書金縢曰乃逢是古今尚書作竝

庭實旅百奉之以玉帛 韋昭曰庭實庭中之實百舉

成數也棟謂庭實車馬之屬玉帛束帛加璧呂覽曰
荀息以屈產之乘為庭實而加垂棘之璧是也

廿三年傳會以訓上下之則制財用之節朝以正班爵
之義帥長幼之序又云諸侯有王王有巡守以大習
之注大習會朝之禮案管子幼官篇曰千里之外
二千里之內諸侯三年而朝習命二千里之外三千
里之內諸侯五年而會至習命所謂大習者蓋習會
朝之教命也

廿四年傳女贅不過榛栗棗脩正義曰先儒以為栗取其戰栗也棗取其早起也脩取其自脩也說本范甯
唯榛無說 棟案榛說文引作𣎵从木辛聲云果實
如小栗呂堪字林榛木之字亦从辛木云實如小栗
曲禮釋文曰榛古本又作𣎵然則𣎵與栗同義故先
儒不釋𣎵音壯巾反正義以為榛聲近𣎵失之外傳
魯語云夫婦贅不過棗栗以告𣎵也不及榛脩明𣎵
不訓𣎵

字林曰榛木叢
生也非果實

廿八年經冬築郿 京相璠曰公羊傳謂之微在東平
壽張縣西北三十里有故微鄉魯邑也棟案公羊釋
文云築微左氏作麋麋古文眉眉與微古今字特牲
饋食禮眉壽萬年鄭注云古文眉為微

蒲與二屈君之疆也 韋昭曰疆竟也二屈屈有南北
河東有北屈則是時復有南屈酈元案汲郡古文曰
魏襄王十一年翟章救鄭次于南屈

鄭人將奔桐丘注許昌縣東北有桐丘城 京相璠曰

今國無而城見存西南去許昌城可三十五里俗名之曰隄其城南即長隄因洧水之北防也西面桐邱其城邪長而不方蓋憑邱之稱即城之名矣

諜告曰注諜閒也 案周禮環人云搏諜賊注云諜賊反閒國賊郭璞曰諜今之細作也

臧孫辰告糴于齊禮也 子惠子曰周書糴匡篇年儉穀不足君親巡方卿參告糴故外傳臧文仲曰國有饑饉卿出告糴古之制也辰也備卿辰請如齊凡稱

金
禮皆周制也

廿九年傳水昏正而栽 蔡邕月令章句引傳曰水昏
正而栽築即營室也昏正者昏中也栽築者栽木而
始築也

卅二年傳臨黨氏 釋文云黨音掌郭忠恕曰黨氏之
黨音之仰反與鄉黨字別襄廿九年傳黨叔定七年
公族黨氏哀十一年黨氏之溝同音掌

圉人犂 家君曰圉猶扈也公羊作扈文異義同

能投蓋于稷門 服虔曰能投千鈞之重過門之上杜
氏曰蓋覆也走而自投接其屋之桷反覆門上劉炫
規過曰公言聲有力焉如杜此說勁捷耳非有力也
當謂投車蓋過於稷門棟謂杜說鑿劉說淺服說近
之

成季奔陳 服虔曰季友內知慶父之情力不能誅故
避難出奔

閔元年傳親有禮因重固 說文引云種有禮因重固

因就也从口大能大者衆圍就之服虔曰重不可動
因其不可動而堅固之杜氏从許君說

趙夙注趙衰兄 案世本公明生孟及趙夙夙生成季

衰史記以衰為夙之孫晉語以為夙之弟無緣繆戾

至此且夙與衰世次相縣不應為弟兄必傳寫之譌

史記所見異辭當以世本為正

焦氏易林云伯夙奏獻衰續厥緒則非見

弟明
矣

畢萬注畢萬魏驪祖父 世本曰萬生芒季季生武仲

州禮記正義引世本云州生莊子降降生獻子荼荼萬生芒芒生季恐非

生簡子取取生襄子多多生桓子駒駒生文侯斯禮記

正義州即欒也降即絳也荼即舒也多即曼多也宰相

世系曰欒生悼子悼子生昭子絳史記索隱曰系本

云武仲生莊子絳無悼子又系本居篇曰魏悼子徙

霍則是有悼子系本卿大夫代自脫耳昭子徐廣曰

世本曰莊子索隱曰世本錯也居篇又曰昭子徙安

邑與此文同愚案左傳亦作莊子

先為之極 服虔曰言其祿位極盡於此

為吳大伯 子惠子曰穆天子傳云大王亶父之始作
西土封其元子吳大伯于東吳詔以金刃之刑賄用
周室之壁上文分之都城而位以卿是以大伯之地
處之但曲沃在近地故欲使逃之以順父志也

以是始賞天啓之矣 服虔曰以魏賞畢萬是為天開
其福

辛廖注晉大夫

劉炫曰若在晉國而筮何得云筮仕

於晉又辛甲辛有竝是周人何故辛廖獨為晉大夫服氏以為畢萬在周筮仕於晉是也

二年經齊人遷陽 正義曰杜世族譜土地名闕不知所在 棟案地理志東海都陽縣注應劭曰春秋齊人遷陽是又城陽國陽都縣注應劭曰齊人遷陽故陽國是一國兩屬未詳孰是

傳虢公敗犬戎于渭汭 服虔本作渭隊注云隊謂汭也

鶴有乘軒者 服虔曰車有藩曰軒

遂滅衛 詩載馳序云衛懿公為狄人所滅鄭箋云滅者懿公死也君死於位曰滅閻百詩曰下文狄入衛方是入其國都孔疏傳言滅而經書入引釋例為從齊桓告諸侯之文殊不然

衛侯不去其旗 胡渭生曰去藏也古人以藏為去棟案鄆陵之戰乃納旌於韜中胡說是

立戴公以廬于曹注廬舍也 案公劉詩曰于是廬旅

毛傳云廬寄也小尔疋同管子中匡篇曰狄人攻衛
衛人出旅於曹外傳作廬訓為寄故詩序亦言東從
渡河野處漕邑詩序漕字从水旁曹傳作曹古文省
與門材 周禮掌舍為壇墼宮棘門杜子春云棘門或
為材門正義云衛文公居楚邱國家新立齊桓共門
材先令豎立門戶以材木為門也

東山臯落氏 劉昭案上黨記曰東山在壺關城東南
晉申生所伐今名平臯服虔曰赤狄之都也

有守則從 服虔曰有代太子守則從君

從曰撫軍 服虔曰助君撫循軍士

君其舍之 服虔曰舍之置申生勿使將兵也

不對而退 服虔曰里克不對

公衣之偏衣 服虔曰偏衣偏袷之衣偏異色駁不純

袷在中左右各異故曰偏衣此說詳於杜袷即督也

莊子緣督以為經

羗涼 說文引作羗涼云羗羗牛也牛之雜色者不中

為犧牲衣之不純者不得為太子若以危為涼義無

所取古文省少或借涼為涼

補正引林氏說亦未當

金玦不復 應劭曰復反也金玦猶決去不反意也荀卿子曰絕人以玦

昔辛伯諗周桓公注諗告也 案說文曰諗深諫也

外寵二政 棟案二讀為王貳于號之貳韓非子引此正作貳

與其危身以速罪也 服虔曰速召也疾也言太子不

去自必危疾召罪孤突知其亂本既成而太子拘於
一節不達至孝之義與梟落雖戰勝而歸猶不能免
於難而使父有悖惑殺子之罪故傳備衆賢之言以
迹太子所以死也經在僖公五年晉侯殺其世子申
生

大帛之冠 鄭康成引作白云大白冠大古之布冠也
注蓋用諸侯諒闇之服 家君云此杜預自造之語俗
語杜撰本此棟案服虔曰戴公卒在於此年故杜彌

縫其說耳

僖元年經次于聶北 說文引作聶北云讀與聶同

邢遷于夷儀注夷儀邢地 司馬彪郡國志曰東郡聊
城有夷儀聚薛瓚曰今襄國西有夷儀去襄國百餘
里

傳諸侯救邢注實大夫也而曰諸侯總衆國之辭 家
君曰實大夫也何得稱為諸侯此預之妄也

二年傳保於逆旅 案逆旅亦作御旅見荀子

御與逆通周官

有掌訝先鄭云訝讀為跛者訝跛者之御迎也與逆訝案公羊訝作御尚書迓字皆為御

通

四年經齊人執陳轅濤塗釋文作袁穀梁傳同云本多作

轅案國三老袁良碑云周之興滿為陳侯至元孫濤

塗立姓曰袁法言曰齊桓公欲徑陳陳不果內執袁

濤塗皆不从車旁今本及唐石經皆作轅王伯厚曰

轅與袁同

傳唯是風馬牛不相及也賈逵曰春秋正義作服虔風放也

牝牡相誘謂之風案呂覽曰乃合羶牛騰馬游牝於
牧高誘曰羶牛父牛也騰馬父馬也皆將羣游從牝
於牧之野風合之其說與賈侍中蓋同漢儒相傳有
是語也

尚書云馬
牛其風

爾貢包茅不入 子惠子曰韓非子外儲說曰是時楚
之菁茅不貢於天子三年矣

無以縮酒 案說文引作菑酒云禮祭束茅加于裸圭
而灌鬯酒是為菑象神歆之也

鄭少韜
說同

一曰菑榼上

塞也鄭大夫讀菑為縮詩伐木云有酒湑我毛傳曰

湑菑之也是先鄭以來皆作菑讀為縮也

周伯琦六書正譌云

菑从艸酉酉即酒字會意左傳無呂菑酒俗用縮非汗簡云古文尚書縮作菲案菲為古文酉是菲即菑也說文酉部有菑字而艸部又有菲字以為鬼葵此必菲字之誤周禮醢人有菲苴詩薄采其菲皆从艸徐邈音柳是混菲菲而為一非也

昭王南征而不復

唐石經云昭王南征没而不復

案碑

没字後增或據古本益之

高誘呂覽注引此傳與石經同

死王事加二等於是有以袞斂

賈逵曰死王事謂朝

天子以命用師袞斂上公九命服袞也

且其繇曰服虔曰繇抽也抽出吉凶也

五年傳遂登觀臺五經異義云古春秋左氏說曰天子靈臺在大廟雍之靈沼謂之辟廱諸侯有觀臺皆以望嘉祥也服虔曰人君入大廟視朔天子曰靈臺諸侯曰觀臺在明堂之中

凡分至啓閉必書雲物為備故也服虔曰分謂春秋分至謂冬至夏至啓立春夏也陽氣用事為啓閉立秋

冬也陰氣用事為閉雲五雲也物風氣日月星辰也
分至啓閉天地之大節陰陽之分也故遂登觀臺望
氣以審妖祥變亂之氣先見於八節審其雲物之形
言其所致務為之備也

虞不臘矣 朱子曰秦時始有臘祭而左氏謂虞不臘
矣是秦時文字分明案御覽引舊注云臘祭名也日
月會于龍尾百物備合因于是祭羣神也正義云月
令孟冬臘門閭及先祖五祀臘之見於傳記者唯月

令與此二文而已秦本紀惠王十二年初臘始皇三十一年更改臘曰嘉平應劭風俗通曰案禮夏曰嘉平殷曰清祀周曰大蜡漢改曰臘此之虞不臘者明當時有臘祭周時臘與大蜡各為一祭言漢改曰臘不蜡而為臘耳又案蔡邕月令章句曰夏曰清祀殷曰嘉平周曰蜡秦曰臘棟案如應蔡之說則三代本有清祀嘉平蜡臘之祭歷代因革故秦惠十二年改蜡為臘始皇三十一年更改臘曰嘉平是臘與嘉平

皆三代祭名朱子以秦始有臘祭考之不審耳

丙之晨 子惠子曰師法用辰不用日丙日也子辰也
言丙不言子者日在尾故舉日不舉辰為客時為
主人故言丙之晨

均服振振 服虔曰均服黑服也古戎服尚黑戰國策
左師觸龍曰老臣賤息舒祺最少不肖而臣衰竊愛
憐之願令補黑衣之數以衛王宮注云黑衣戎服漢
書作衯 劉逵注吳都賦 儀禮士冠禮云兄弟畢衿玄
引此傳亦作衯

鄭注曰衿同也古文衿為均司馬彪輿服志云郊祀

之服皆以衿玄淮南子曰尸祝衿衿高誘云衿純服

衿黑齋衣也衿衿猶衿玄

衿字篆書與衿相似

上下皆玄故謂

之黑服謂均服為黑服失之衿古文皆作均杜氏謂

戎事上下同服是也管子大匡篇云四年脩兵同甲

十萬同甲者均服之謂也

呂覽王孫滿謂秦師曰今初服回建左不載而右之

高誘曰初同也兵服上下無別

故曰初服初當作衿傳寫之誤

而脩虞祀 子惠子曰終宮之奇之言

六年傳許男面縛 子惠子曰漢書項羽傳馬童面之
張晏曰背之也師古曰面之謂背之不面向也面縛
之亦謂反背而縛之杜元凱以為但見其面非也

七年傳若總

石經作惣孫恂曰此俗字當作總

其罪人以臨之 戰國

策曰楚請道以臨韓魏高誘曰臨猶伐也

定二年傳以師臨我

同

會而列姦注列姦用子華 當云用子華為內臣昭四
年傳云姬在列者言姬姓為君者也子華欲以鄭屬

齊為附庸之君齊若許之是列姦也故下云記姦之位位謂君位杜下注云會位失之如杜說何以經仍書鄭世子華乎必不然矣

君盟替矣 三體石經作替

說文云替廢一偏下也从
並白聲或从曰或从𣎵从

曰

子華由是得罪於鄭 服虔曰鄭伯罪之也

八年傳不殯於廟 服虔曰廟謂殯宮鬼神所在謂之
廟服知周法不殯于廟故以為殯宮

九年經晉侯詭諸卒 案唐石經及釋文皆作侂惟穀

梁傳作詭釋文云左傳作侂又案鄭固碑云造邾侂

辭是侂與詭通

傳王使宰孔賜齊侯胙 服虔曰胙膳內周禮以胙膳

之禮親兄弟之國不以賜異姓敬齊侯比之賓客

以是藐諸孤注言其幼賤與諸子縣藐 案呂諲字林

曰藐小兒笑也

文選注

顧君訓藐為小亦未當

公家之利 高誘呂覽注云公家公之朝也

齊隰朋 王符曰隰氏姜姓

能鬪不過 棟案此即外傳所謂怒不及色也韋昭曰
無色過

臣聞之唯則定國 子惠子曰呂覽慎大覽引以為詩
詞蓋逸詩也

十年傳孤突適下國 服虔曰晉所滅以為下邑一曰
曲沃有宗廟故謂之國在絳下故曰下國

余得請於帝 服虔曰帝天帝請罰有罪

七輿大夫注侯伯七命副車七乘服虔曰下大夫輿

師七人屬申生者棟案服杜二說皆非也晉國之

法上大夫二輿二乘中大夫二輿一乘下大夫專乘

專乘謂一輿

見韓非子

文公作三行景公時改為三軍大

夫一司馬三行為六輿司馬專乘合七輿之數後遂

以為官名故襄廿三年傳云七輿大夫與欒氏蓋自

文公以後始有七輿獻公時止有二行一尉不得為

七輿七當為五古五字如七

見王肅詩傳

遂謚為之叔堅

以下舉里丕之黨不必皆在七輿之數杜以七人為
七輿則左右行又何說與

十一年傳賜晉侯命注諸侯即位天子賜之命圭為瑞
家君曰命圭世守之未聞新君再賜古禮新天
子輯瑞諸侯薨還圭若國易一君亦易一瑞則古無
是禮

十二年經春王三月庚午日有食之 隋志曰推合庚
午朔

傳若節春秋 杜从賈逵訓節為時案王肅曰春秋聘
享之節也

應乃懿德 應讀曰膺言膺受女美德也古文皆以應

為膺

尚書康誥曰應保殷民亦古文膺字故徐邈音於甑反後人以為應對之應失之廣雅釋言云

應受也

十四年經諸侯城緣陵 薛瓚曰北海營陵縣春秋謂
之緣陵

十五年經夏五月日有食之 隋志曰推合癸未朔

齊師曹師伐厲注厲楚與國義陽隨縣北有厲鄉案

桓十三年傳云楚子使賴人追之杜注與此畧同昭

四年經云楚伐吳遂滅賴公羊傳于此年賴作厲釋

文云厲如字又音賴公羊僖十五年釋文云厲舊音

賴則知厲與賴本一國古音通故或作厲或作賴也

論語云未信則以為厲已也康成注云厲讀為賴司馬彪曰汝南褒侯縣有

賴亭故賴國

傳秦穆姬屬賈君注晉獻公次妃案獻公取于賈則

是正妃為惠公之適母何須穆姬之屬唐尚書曰賈君申生妃故僖十年傳云夷吾無禮此為近之

東盡虢畧 司馬郡國志云宏農陸渾西有虢畧地

夫狐蠶必其君也 狐無喻君之理齊詩有雄狐謂襄公也齊襄通于文姜晉惠通于賈君故以狐為君

寇深矣 戰國策三國攻秦入函谷秦王謂樓緩曰三國之兵深矣高誘曰深猶盛也

步揚御戎注卻犛父 世本曰卻豹生義義生步揚步

揚生州州即驛也

孫恂曰食米于步後因氏焉

亂氣狡憤 鄭康成曰憤怒氣充實也

曰上天降災使我兩君匪以玉帛相見而以興戎若晉

君朝以入則婢子夕以死夕以入則朝以死唯君裁

之 以上四十二字

釋文云四十七字案文當作四十二字

孔氏正義

从定本刪宋以來又从唐石經采入

北宋本五經正義不載經註南

宋以後始增入也

公子贄 韋昭據禮記云贄字子顯盧植曰古者名字

相配顯當為鞅

無始禍 高誘曰始首也

其卜貳圉也注貳代也 棟謂貳副也坊記曰孝以事

君弟以事長示民不貳也故君子有君不謀仕惟卜

之日稱貳君

鄭氏曰卜之日謂君有故而為之卜也唯卜之時辭得曰君之貳謀尔又引此

傳以證之周禮有卜立君之文外傳云其改置以代圉故杜訓貳為代兩傳異文似不必牽合

晉於是乎作爰田注分公田之稅應入公者爰之於所

賞之衆 服虔曰爰易也賞衆以田易其疆畔棟謂

爰田者猶哀公之用田賦也下文作州兵者猶成公
之作邱甲也外傳爰作轅賈逵曰轅車也以田出車
賦說文曰爰籀文以為車轅字春秋左傳多古字古
言故以爰為轅服訓爰為易易田之法本是周制何
云作也漢書地理志曰秦孝公用商君制轅田豈亦
賞衆以田邪外傳所云賞衆是一時之事爰田州兵
是當日田制兵制改易之始故特書之其後文公作
執秩而官制又變晉之所以彊者未必不由乎此然

其後六卿分晉而晉先亡君子于是知舊章之不可易也

敗于宗丘 案曲禮注邱與區同音故與上姬旗為協顏師古曰今江淮田野之人猶謂區為邱亦古之遺音也

蛾析 釋文曰本或作蟻婁壽曰古蛾與蟻通漢書白蛾羣飛扶服蛾伏陳球後碑蜂聚蛾動仲秋下旬碑蛾附皆與蟻同析釋文作暫與石經異

十六年經是月也六鷁退飛過宋都 釋文曰鷁本或作鷁案說文引春秋傳亦作鷁或从二傳之文左氏當不爾也

公子季友卒注稱字者貴之 杜以為季字友名劉炫以季為氏云季友仲遂皆生賜族非字也

傳吉凶由人 漢書由作繇是也由訓為生古文粵字

吉凶生乎人
故云由人

十七年傳齊侯好內 服虔曰內婦言也

因內寵以殺羣吏 服虔曰內寵如夫人者六人羣吏
諸大夫也

十八年傳無以鑄兵 棟案楚金利鄭刀良故云無以
鑄兵禹貢荆揚二州貢金三品鄭康成曰銅三色考
工記云鄭之刀遷乎其地弗能為良是也高誘曰鑄
讀作祝 鑄祝屬注古皆同音 辨見詩古義史記秦本紀云始皇
二十六年收天下兵聚之咸陽銷以為鍾鐻金人十
二重各千石應劭曰古者以銅為兵杜氏之注本此

十九年傳次睢之社 張華博物志曰琅邪臨沂縣東
界次睢有大叢社民謂之食人社即次睢之社

退脩教而復之注復往攻之 今唐石經及宋本皆云
復伐之陸氏以伐為衍字

廿一年經盟于鹿上注宋地 案司馬彪郡國志曰濟
陰乘氏縣有鹿城鄉酈元曰春秋之鹿上也

春秋左傳補註卷一

欽定四庫全書

春秋左傳補註卷二

元和惠棟撰

僖廿二年傳螽蟴有毒 李翊夫人碑作螽蟴螽古文
螽蟴說文作蜚云或从虫又云螻蚌屬从虫萬聲非
毒蟲也

大司馬固諫曰 顧炎武曰大司馬即司馬子魚也固
諫堅辭以諫也杜以固為名謂莊公之孫公孫固者

非朱鶴林案史記宋世家則前後俱子魚之言棟案

晉語云公子過宋與司馬公孫固相善韋昭曰固宋

莊公之孫大司馬固也公子過宋適當襄公之時韋

杜皆據世本而言稱大司馬所以別下司馬也顧氏

不見世本而曲為之說失之史記疎畧不足取證大

司

馬與大宰不在六卿之列文七年穆襄之族殺公孫
固時樂豫為司馬泓之戰子魚為司馬明大司馬是

宋之孤卿也文七年正義云宋上公禮得有孤
且春秋變周不必如禮晉有太師太傅僭為之

明恥教戰求殺敵也注明設刑戮以恥不果案吳子

曰凡制國治軍必教之以禮厲之以誼使有耻也夫
人有耻在大足以戰在小足以守明恥以教戰者所
以厲其勇周書曰明恥示教蓋當時之語如此杜解
迂回

則如勿傷 何休曰如即不如齊人語也下同

示之俘馘 說文作俘馘云軍戰斷耳也从耳或聲或
从晉案呂譔字林截耳則作耳旁獻首則作首旁杜
云馘所載耳明當从耳旁馘或作馘見漢碑或作國

見周禮

古國或字通
鍾鼎文皆然

廿三年傳遂取焦夷注焦今譙縣也 案焦譙古通用

小黃門譙敏碑以焦贛為譙贛是也

策名委質 服虔曰古者始仕必先書其名於策委死

之質於君然後為臣示必死節也棟案服讀質為贄

晉語曰臣委質于翟之鼓韋昭曰質贄也士贄以雉

委贄而退尚書稱二生一死贄故云委死之質服說

頗勝於杜當从之

既注此而考顧氏補正亦與
余同但不引服注故仍存之

杞成公 譙周古史考云惠公生成公及桓公

曹共公 高誘曰共公名襄昭公之子

聞其駢脅 說文作駢脅云并脅也从骨并聲論衡作
仇脇

既而揮之 振去匱中之水故曰揮

何承天曰杜氏訓振去為揮

揮為湔正義謂以濕手揮之使水湔汚其衣疑非

廿四年傳軍于郇注解縣西北有郇城服虔曰郇國
在解縣東郇瑕氏之虛也酈元案竹書紀年云晉惠

公十有五年秦穆率師送公子重耳圍令狐桑泉曰
衰皆降焉晉師狐毛與先軫禦秦至于廬柳秦穆公
使公子絳來師言退舍次于郇盟于軍京相璠春秋
土地名曰桑泉曰衰竝在解東南不言解明不至解
可知春秋之文與竹書不殊今解故城東二十四里
有故城在猗氏故城西北鄉俗名之為郇考服虔之
說又與俗符賢於杜氏單文孤證矣說文云郇讀若
泓

秦伯送衛于晉三千人實紀綱之僕 韓非子曰穆公

以疇騎二千輔公子重耳入之于晉禮記曰漢律民

年二十傳之疇官各从其父學習騎射故謂之疇騎

即所謂紀綱之僕也高誘曰衛猶護助也

服虔文七年注云衛

從兵也

以志吾過 鄭康成曰志古文識識記也

昭四年傳且曰志之十三

年傳歲聘以志業皆古文識蔡邕論語曰賢者志其大者今作識

伯服 史記作伯備備與服古字通詳易考

昔周公弔二叔之不咸故封建親戚以藩屏周荀子
儒效篇曰周公兼制天下立七十一國姬姓獨居五
十三人而天下不稱偏焉

召穆公詩正義曰依世本穆公是康公之十六世孫

詳見服虔注

好聚鵠冠子惠子曰鵠一作述逸周書曰知天文者
冠述顏師古以為子華好與術士遊然案下文服之
不衷則不必如顏說也

石甲父 廣韻引作甲石父

省視官具于汜 戰國策曰天子巡狩諸侯避舍納莞
鍵攝衽抱几視膳於堂下天子已食而退聽朝也

廿五年傳請隧 杜依賈逵以為王之葬禮韋昭曰隧
六隧之地事見周禮此可備一說

未有代德而有二王 周書芮良父曰觀天下有土之
君厥德不遠罔有代德

廿六年經楚人滅夔 古史考云滅歸太康地志曰歸

鄉故夔子國

尚書中侯曰伯禹膺首讓于益歸鄭康成注云益歸賢者堯臣歸讀曰夔

傳公使展喜犒師

外傳云以膏沐犒師服虔曰以師

枯槁故饋之飲食高誘淮南子注曰酒肉曰餉牛羊

曰犒芬其指犒也謹案禮記言犒非古字古文作橐

或作槁張揖撰廣雅始从牛旁高洪氏隸續載漢碑

有勞醕之語醕與犒同公羊注云牛酒曰犒故其字

一从牛一从酉漢隸皆然非古文也說文無犒字

周禮小行人云若國師役則令犒禮之注云故書犒

為橐鄭司農曰橐當為犒謂犒師也先鄭不言字誤
明古犒字本作橐或作犒與服子慎枯犒之說合張
有復古編云鎬餉也从金高別作犒非五經文字注
勞師借犒字為之案說文鎬溫器也以鎬為犒勞字
無據

我先王熊摯有疾鬼神弗救而自竄于夔正義案鄭
語孔晁注云熊繹玄孫曰熊摯有疾楚人廢之立其
弟熊延熊摯自弃於夔子孫有功王命為夔子

韋昭注同

索隱據譙周古史考熊渠卒子熊翔立卒長子摯有疾少子熊延立

廿七年傳夏書曰注尚書虞夏書也 正義曰此古文

虞書益稷之篇漢魏諸儒不見古文因伏生之謬從堯典至胤征凡二十篇總名曰虞夏書棟案尚書二典皆夏史官所作故總謂之夏書此孔子刪書之本也故墨子明鬼篇曰尚書夏書其次商周之書伏生增為虞夏書梅賾又改為虞書皆非孔氏之舊孔穎

達又以曲說扶之雅所不取

傳引二典皆稱夏書惟文十八年云虞書數舜

之功此

必有誤

樂枝 韋昭曰樂共子之子杜注本賈逵

荀林父 世本曰晉大夫逝邀生桓伯林父案僖廿八年林父始將中行故改中行氏

廿八年傳殺子叢以說焉謂楚人不卒戍也 高誘淮南子注云說解也一本謂楚人下有曰字衍文

曹人兇懼 說文云兇擾恐也从人在凶下

乘軒 毛公詩傳云大夫以上赤芾乘軒

且曰獻狀 案獻狀謂觀狀也先責其用人之過然後
誅觀狀之臯以示非報惡也顏籀以為先責不用負
羈而乘軒者衆因曰今我之來獻駢脅容狀耳斯蓋
蚩弄之言猶言若云謂秦拜賜之師也其說亦通
不有寧也 劉炫規過以傷為寧不有寧謂不有損傷
半農先生曰古人多反語如甘為苦治為亂皆是以
傷為寧亦有理

我曲楚直其衆素飽 周書武稱曰直勝曲飽勝飢武
之勝也子犯言背楚之惠則我曲楚直且楚強其衆
又素飽不可為老也杜訓素為空言直氣盈飽恐非
原田每每舍其舊而新是謀 說文云每艸盛土出也
从艸母聲高巾之田艸盛土出故云舍其舊而新是
謀周禮三卜一曰原兆兆之豐鎛有似原田故鄭氏
注云原原田也

楚子伏 余仁仲曰楚子伏已而監其腦此本伏字絕

句岳本伏已讀據此則已當音以據岳本則已當音
紀陸德明音義不云音紀則知當以楚子伏為絕句
而已作以音不音紀淳祐九經本亦用伏已絕句更
詳之

請與君之士戲 朱國禎曰戲者兵也三軍之號所云
戲下是也若云以兵見云耳林堯叟謂得臣輕用民
命便解作戲弄之戲夫得臣亦英雄豈有此失杜征
南獨不下一字已得其解矣

鞬鞞鞞鞞 說文引作鞬从革顯聲棟案鞬古文以為
顯故傳作鞬从古文省

少長有禮其可用也 子惠子曰應前欲用其民

鄉役之三月 說文引作鄉云不久也陸氏云本又作

鄉

糾逖王慝 衛彈碑云糾剔王慝案魯頌狄彼東南鄭
箋云狄當為剔剔治也逖與狄同古文作遏又與剔
通故或訓為遠或訓為治此傳當从古文作遏訓為

治 淮南子云兪兒狄牙嘗溜澠之水而別之狄牙即易牙是狄與易通白虎通云狄者易也

瓊弁玉纓 說文引云璿弁玉纓張衡集同薛綜曰弁馬冠也又髦以璿玉飾之纓馬鞅也以玉飾之

寘諸深室 荀卿子曰公侯失禮則幽故寘諸深室

晉侯作三行以禦狄 鄭康成曰行謂軍列周禮有行司馬取名于此案獻公時已有左右行至此復立中行後改為三軍大夫

卅年傳然鄭亡子亦有不利焉 唐石經云雖然鄭亡

云云案碑是書丹後改定必有所據

焉用亡鄭以倍鄰 唐石經及宋本皆作陪釋文仍作
倍案注當作倍

若不闕秦將焉取之 新序引云不闕秦將焉取之唐

石經初刻云不闕秦焉取之正義案沈文何云不闕

秦家更何處取之案此則若字將字皆衍文俗儒從

石經續刻增入當刪宋本云由不闕秦焉取之亦誤

請無與圍鄭許之 服虔曰晉善蘭不忘本國故也

卅一年傳自洮以南 酈元曰今甄城西南五十里有
桃城或謂之洮案甄城漢屬濟陰

卅二年傳將殯于曲沃 鄭衆周禮注曰將葬朝于祖
考之廟而後行晉宗廟在曲沃故曰曲沃君之宗也
又丙午入于曲沃丁未朝于武宮

孟子 唐石經初刻作孟兮後改子釋文作孟子云本
或作孟兮

中壽 三體石經作耆

卅三年傳超乘 高誘曰超乘巨踊車上也

厲兵秣馬 高誘曰厲利其兵釋文曰秣音末穀馬也
說文作𩚑云食馬穀也

鄭之有原圃猶秦之有具囿 高誘曰原圃在今河南
中牟具囿在馮翊池陽一名陽紆

其為死君乎 猶言不為死君乎君在殯故稱死君顧
氏補正以死其君為解案成十三年絕秦書曰文公
即世穆為不弔蔑我死君則顧之說未盡然也

子墨衰經 賈逵曰墨變凶

遂墨以葬文公 服虔曰非禮也

康誥曰父不慈子不祗兄不友弟不共不相及也 昭

廿年傳在康誥曰父子兄弟罪不相及孔氏謂非康

誥之全文引其意而言之棟謂此康誥之闕文也法

言曰酒誥之篇俄空焉伏生引酒誥曰王曰封惟曰

若圭璧今酒誥無此文故漢藝文云酒誥脫簡一梓

材今王惟曰以下文義不屬蓋康誥三篇皆有脫誤

孔以為引其意而言之非也

外僕髡屯禽之以獻 崔憬易注曰禽古擒字擒猶獲也

陽子宣言曰 高誘戰國策注曰宣徧也案高注本尔足

文元年經叔孫得臣 世本曰桓公生僖叔牙牙生戴伯茲茲生莊叔得臣得臣生穆叔豹

傳來錫公命 唐石經及宋本錫作賜釋文同云本或

作錫觀禮云天子賜舍注云今文賜作錫

役夫管子曰處里為下陳處師為下通謂之役夫

宜君王之欲殺女而立職也案韓非子作廢女上云

黜商臣合作廢

能行大事乎服杜皆以為弑君案高誘戰國策注云

大事兵事傳曰國之大事在祀與戎故下云以宮甲

圍成王

二年傳秦伯猶用孟明鄭注儀禮云猶者守故之辭

大事于太廟躋僖公逆祀也 古文左氏說曰大廟周公之廟饗有禮義者也祀國之大事也惡其亂國之大事於大廟故言大事也躋登也登僖公於愍公上逆祀也

夏父弗忌 禮器云夏父弗綦鄭詩大叔于田云叔善射忌又良御忌鄭箋云忌讀如彼已之子之已案曹詩候人彼已之已作其其可讀為記則忌亦可讀為其古基字期字皆省作其與綦同音是弗忌讀為綦

如厥愁為厥銀居吾語汝為姬魚語女字隨讀變從

而辨之可識古音

表記引侯人云彼記之子不稱其服釋文云記本又作已然則鄭引

曹風詩从三家說也

廢六闕 家語云置六闕王肅曰六闕闕名魯本無此

闕文仲置之以稅行者故曰不仁棟案廢與置古字

通公羊傳曰去其有聲者廢其無聲者鄭志答張逸

曰廢置也

何休曰廢置也置者不去也齊人語

以廢為置猶以亂為治

祖為存故為今曩為曩苦為快臭為香藏為去郭璞

所謂詰訓義有反覆旁通美惡不嫌同名也杜氏云
六闕所以禁絕末遊而廢之周禮建國有門闕闕安
可廢況後傳塞闕陽闕皆有明文豈旋廢之而旋復
之與杜氏此說昧于義矣小介足亦以廢為置杜集
解頗用孔鮒之說獨不及此何也 上文云下展禽

下猶去也

見周禮司民注論語
柳下惠為士師三黜

廢六闕廢猶置也廢

與下文相對

周語富辰曰小怨置大德章
昭曰置猶廢也彼此互訓

三年傳取王官及郊 括地志云王官故城在同州澄

城縣西北九十里又云南郊故城在縣北十七里又有北郊故城又有西郊故城

遂自茅津濟 史記秦本紀云繆公元年自將伐茅津
劉伯莊云戎號也司馬彪郡國志云河東大陽有茅
津劉昭引杜注云在縣西南有茅亭即茅城括地志
云茅亭及茅城在陝州河北縣西二十里水經注云
茅亭茅戎號

封穀尸而還 賈逵曰封識之案易繫曰不封不樹虞

翻注云穿土稱封封下窆字但穀尸多不能用葬禮故杜云埋藏之

四年傳圍剋新城 服虔曰秦邑新所作城也

諸侯敵王所愾注愾恨怒也 案說文引作鑣从金氣聲云怒戰也許氏所據多古文必得其實

六年經季孫行父如陳注行父季孫友子 案世本云

公子友生齊仲齊仲生無逸無逸生行父 穀梁疏云世本云季

友生仲無佚佚生行父 行父生夙案文當云季友孫范甯云行父季友生

乙孫友衍子字傳寫誤也

六年傳以子車氏之三子奄息仲行鍼虎為殉服虔
曰殺人以葬璇環其左右曰殉

道之以禮則案唐石經無以字俗儒所加後人遂以
則字屬下句

士會注隋季也世本曰范氏晉大夫隰叔之子士為
之後為生成伯缺缺生武子會會生文叔燮燮生宣
叔臼臼生獻子鞅鞅生吉射棟案范氏本陶唐氏之

後襄廿四年傳范宣子曰昔勾之祖在夏為御龍氏
注云謂劉累也又云在周為唐杜氏汲郡古文曰成
王八年王師滅唐遷其民于杜杜伯之子隰叔違難
奔于晉生子輿即士蒍也士蒍生士穀士穀生士會
食邑於范是為范武子故宣子曰晉主夏盟為范氏
焦弱侯曰士穀士會士皆當作土傳譌耳讀為杜土
姓杜伯之後土即古杜氏棟案古土字皆作士
史記曰有邦有士今呂刑作土周頌曰保有厥士義

見牧
敦

作土呂覽任地曰后稷曰子能吾士靖而畊浴士乎

高誘曰士當作土周牧敦亦以士為土焦氏以為傳

譌非也土本古杜氏鄭康成周禮注

校人職

云世本曰

相士作乘馬

竹書亦作士

荀卿子曰杜作乘馬楊倞案世

本相土作乘馬

今左傳亦作相土从古文

毛詩自土沮漆齊詩作

自杜又云徹彼桑土韓詩作桑杜毛詩左氏傳皆出

孔壁中故多古文范氏在夏為劉氏周以前為唐氏

昭元年傳云唐人是因以服事夏商是也周以後為

杜氏春秋時為范氏是會之帑留秦者又為劉氏自
虞以來世次秩然故宣子以為死而不朽焦氏讀士

為土訓為杜其言亦卓余故存而論之

晉語警祐曰
隰叔子違周

難於晉國生子興為理韋昭曰理士官也班固亦言
晉主夏盟為范氏范氏為晉士師是范氏先以官為
氏以士為杜恐
未然也存考

殺諸郕 博物志云殺之郕邵云河東垣縣有郕邵之
阮襄廿三年云戍郕邵此其地也

將焉寘此 服虔曰寘置也此太子

頓首于宣子 少儀曰婦人吉事雖有君賜肅拜注云
婦人以肅拜為正凶事乃手拜耳孔正義曰言肅拜
婦人之常左傳穆嬴頓首於宣子之門有求於宣子
非禮之正也愚謂穆嬴有襄子之喪以非喪次故用
吉拜而頓首也

此子若才吾受子之賜 服虔曰如子為善教誨此子
使之有賢才知人君之道也則吾受子之賜賜猶惠
不才吾惟子之怨 服虔曰才而受賜美其教也不才

怨子惡其教不至也

今君雖終言猶在耳 服虔曰君沒未久而言聲語氣尚在耳

宣子與諸大夫皆患穆嬴且畏偁 服虔曰患穆嬴以君顧命之言責已也畏他公子相逼迫也

叔仲惠伯 世本曰桓公生僖叔牙叔牙生武仲休休生惠伯彭彭生皮為叔仲氏

惠伯成之 周禮調人職曰凡有鬪怒者成之鄭衆曰

成之謂和之也猶今二千石以令解仇怒

正德利用厚生 賈逵曰正德人德利用地德厚生天德

八年傳梁益耳 東觀漢記曰其先與秦同祖出於伯益別封于梁

九年傳秦人來歸僖公成風之禭注追贈僖公并及成風 注非也成風者僖公之母莊公之妾母以子貴故上經書夫人風氏母以子氏故此經書僖公成風

十年傳麋子 麋亦作麇注不釋其地所在案盛宏之
荊州記云當陽本楚之舊左氏傳云楚潘崇伐麇至
于錫穴穎容釋例云麇在當陽

十一年經承匡注在陳留襄邑縣西 圖稱云襄邑本
襄陵承匡鄉也宋襄公所葬故曰襄陵縣西三十里
有承匡城

傳錫穴 司馬彪郡國志曰漢中錫縣春秋時曰錫穴
椿其喉 鄭康成引作春

子駒之門

王符潜夫論曰魯之公族有子駒氏

以人氏其

門者猶哀十一年黨氏之溝

敗狄于長丘

張華博物志曰陳留封邱有狄溝春秋

之長邱也

十二年傳邲人立君

服虔曰立君改立君不問天子也

邲邲 子惠子曰服虔以邲封為邲邲之家寶圭太子

以其國寶與地夫鐘來奔也然則邲不从邑

不有君子其能國乎 呂覽云國不虛存必有賢者

若使輕者肆焉 服虔曰肆突言使輕銳之兵往驅突
晉軍案詩云是伐是肆鄭箋曰肆犯突也杜謂肆為
暫往而退此釋輕非釋肆也

裹糧坐甲 昭廿七年傳云吳王使甲坐于道荀卿子
云庶士介而坐道故云坐甲

入瑕 京相璠曰今河東解縣西南有故瑕城

十三年傳統朝贈之以策 服虔曰繞朝以策書贈士
會劉勰曰春秋聘繁書介彌盛繞朝贈士會以策子

家與趙宣以書蓋用服說

杜氏以策為馬槌

韓非子曰繞朝

之言當矣其為聖人於晉而為戮於秦也此不可不察是繞朝因贈策之言而戮也左氏不載似韓非據秦史而言

吾謀適不用也

白氏六帖引注云以有策而不用也

其處者為劉氏

宰相世系曰會適秦歸晉有子留於

秦自為劉氏生明明生遠遠生陽十世孫戰國時獲

於魏遂為魏大夫秦滅魏徙大梁生清徙居沛生仁

號豐公名燭字執嘉生四子伯仲邦交邦漢高祖也
家君曰處者為留謂留於秦者遂以為氏漢人改為
劉以合卯金刀之說

十四年傳王叛王孫蘇 劉向九歌云始法言於廟堂

兮信中塗而叛之王逸章句曰叛倍也倍與背同

王初

與王孫蘇後復背之文七年
傳云乃背先蔑此其類也

十五年傳齊人或為孟氏謀 魯三家慶父叔牙季友
慶父之後當云慶氏稱孟氏者鄭康成論語注云慶

父輶死時人爲之諱故云孟氏杜云慶父爲長庶故
或稱孟氏案公羊傳慶父曰吾不得入矣於是抗輶
經而死疏云鄭氏云慶父輶死者正取此文又案禮
緯舍文嘉曰文家稱叔質家稱仲嫡長稱伯庶長稱
孟杜依此爲說

十六年經盟于鄆丘 釋文云鄆音西賈逵云公羊曰
留邱穀梁曰師邱今公羊作犀邱鄆本有西音釋文
是毛詩衡門云可以棲遲前發碑作西遲此其證也

傳師于大林 伍瑞休江陵記曰城西北六十里有林

城春秋至于阜山師于大林即此城也

御覽

百濮 劉伯莊史記地名曰濮在楚西南周書王會曰
伊尹為四方獻令正南曰百濮介足云南至于濮鉞
十七年傳畏首畏尾身其餘幾 高誘曰畏始畏終中
身不畏凡有幾何言常畏也較杜注尤明晰

十八年經六月癸酉葬我君文公冬十月子卒注先君
既葬不稱君者魯人諱弒以未成君書之子在喪之

稱家君曰杜預既葬稱君之說至此而辭窮矣

傳申池 杜氏依京相璠說言申池在齊城南非也申池在海隅齊之藪多竹木故云納諸竹中若近在城南不須言歸舍爵也詳見襄十八年

既而復叔仲氏 世本云桓公生僖叔牙叔牙生武仲休休生惠伯彭彭生皮為叔仲氏

在九刑不忘 棟案九刑謂刑書九篇也周書嘗麥解曰維四年孟夏王命太正正刑書王陟階在東序乃

命太史尚太正即居于戶西南向九州

闕

伯咸進在

中西向宰乃承王中升自客階作筴執筴從中宰坐尊中于太正之前太祝以王命作筴筴告太宗王命

闕

秘作筴許諾乃北向繇書于內楹之門衆臣咸

興受太正書乃降太史筴刑書九篇以升授太正乃

左還自兩柱之門

闕

歲太正曰欽之哉諸正敬功爾

頌審三節無思民因順尔臨獄無頗正刑有掇夫循

乃德式監不遠以有此人保寧尔國克戒尔服世世

是其不殆惟公咸若太史乃降太正坐舉書乃中降
再拜稽首太史乃藏之于盟府以為歲典此周作九
刑之事也案其文云毀則為賊掩賊為藏竊賄為盜
盜器為姦其後李悝著法經六篇始盜賊次四捕其
亦師九刑之意乎

饗饗 饗說文引作飮貪也从食殄省聲

宣二年傳戎昭果毅以聽之之謂禮 大戴禮論四代
之政刑云祭祀昭有神明燕食昭有慈愛宗廟之事

昭有義率禮朝廷昭有五官無廢甲冑之戒

當作戎

昭

果毅以聽然則戎為句昭果毅以聽古語也下四句乃左氏益之耳杜注殊不的

今日之事 高誘曰今日之事御事也

文馬百駟 說文引作馵馬云畫馬也周書王會曰犬

戎馵馬

金本文馬

此馬當畫赤鬣縞身之形非真吉黃之

乘也

補正載邱光庭說文馬馬之毛色有文采者此臆說也

于思于思注于思多須之貌 賈逵曰白頭貌案毛詩

瓠葉云有兔斯首鄭箋云斯白也今俗語斯白之字
作鮮齊魯之間聲近斯正義曰服虔以于思為白頭
貌字雖異蓋亦以思聲近鮮故為白頭也後漢書朱
雋傳賊多髭者號于氏根注引杜注為証案此則于
為須思為白于思為白須也

從臺上彈人而觀其辟丸也 高誘曰從高臺上引彈
觀其走而避丸以為樂也

寘之畚 何休曰畚草器若今市所量穀者也齊人謂

之鍾

三進及溜 釋文曰溜屋雷也案熊氏經說云古有中雷禮蓋儀禮之逸而不傳者雷者屋有複穴開其上以取明雨則雷之因名中庭曰中雷鄉飲記有磬階雷即中雷也大記有東雷注云危棟上也雜記有門內雷即賓執脯賜鍾人之處

民之主也 高誘曰大夫稱主因曰民之主案昭五年傳晏子謂子罕能用善人民之主也亦謂大夫曰主

觸槐而死 高誘曰觸畜也杜氏云槐趙盾庭樹顧君
以為麇退而觸槐則非趙盾庭樹棟案呂覽曰觸庭
槐而死外傳云觸廷之槐而死韋昭曰廷外朝之廷
也周禮王之外朝三槐三公位焉則諸侯之朝三槐
三卿位焉此說得之蓋當時麇退而觸靈公之廷槐
者歸死于君也

遂扶以下公嗾夫焚焉 釋文扶服虔注作跣嗾服本
作嘔正義曰服虔本扶作跣注云趙盾徒跣而下走

又云嗾啾也夫語辭獒犬名公乃啾夫獒使之噬盾
是服讀嗾為啾非作啾此文宋本與今本有異故錄
之

以視於朝 毛詩鹿鳴曰視民不忮鄭箋曰視古示字
士昏禮曰視諸衿鞶汪云視乃正字今文作示俗誤
行之郭忠恕曰鄭君此說大與說文石經相乖郭氏
不識古文其說非也

我之懷矣自貽伊慼 王肅曰此邶風雄雉之詩案今

詩感作阻惟小明詩作感而上句又異王子雍或見

三家之詩據以為衛詩

三家惟齊詩亡于魏代自餘杜氏猶及見之

為法受惡 服虔曰聞義則服案聞義則服弟子職文也王肅曰為書法受弑君之名李厚菴曰此真非夫子之言也

趙盾為旄車之族 鄭氏詩箋旄作輅陸氏曰一本作輅服虔曰輅車戎車之倅

三年傳觀兵于周疆 服虔曰觀兵陳兵于周也

定王使王孫滿勞楚子 服虔曰以郊勞禮迎之也

不逢不若 張平子東京賦云禁禦不若以知神姦螭
魅魍魎莫能逢旃尔足釋詁云若善也郭景純注左
傳曰禁禦不若今左傳作不逢不若案下傳云莫能
逢之杜氏云逢遇也既云不逢又云莫逢文既重出
且杜氏不應舍上句注下句此晉以後傳寫之譌當
从張衡郭璞本作禁禦不若

余為伯儵 說文作百鰕云黃帝之後姑姓

釋文作儵非也

楚人酖之 子惠子曰楚滅江惡其所出為害故酖之
四年傳圖伯嬴 子惠子曰月令省圜圜蔡邕章句云
圜牢也圜止也所以止出入皆罪人所舍也然則圜
圖亦周時之獄焦氏答崇精曰圜圖秦獄恐未然
汰轉 唐石經作汰說文曰泰滑也从升从水大聲徐
鉉云音地達切左傳作汰非昭廿六年傳云齊子淵
射洩聲子中楯瓦繇胸汰轉已八者三寸杜云汰矢
激明汰為滑也

楚人謂乳穀謂虎於菟 唐石經云楚人謂乳為穀謂

虎為於菟說文曰楚人謂虎為烏虬漢書又作於擇

方言注云今江南夷呼虎為虬音狗竇鄭康成尚書

注曰於者鳴聲則於為古文烏穀廣雅作穀

奴口反

箴尹 高誘呂覽注曰楚有箴尹之官諫臣也

王思子文之治楚國也 戰國策曰穰侯之治秦也高

誘曰治猶相也

改命曰生 子惠子曰劉向改名更生本此更生出莊

子

六年傳以盈其貫注貫猶習也 劉光伯據梅賾泰誓
商罪貫盈以為紂之為惡如物在繩索之貫不得為
習其說是也而所據之書非也案韓非子曰有與悍
者隣欲賣宅而避之人曰是其貫將滿也或曰子姑
待之答曰吾恐其以我滿貫也遂去之此說與劉合
可以規杜過矣

王子伯廖注鄭大夫 子惠子曰王子疑非鄭大夫

十年傳崔杼正義曰何休膏肓以為公羊譏世卿而
難左氏蘇氏釋云崔氏祖父名不見經傳則知非世
卿云云案宰相世系曰崔氏出自姜姓齊丁公伋嫡
子季子讓國叔乙食采於崔遂為崔氏濟南東朝陽
西北有崔氏城是也季氏生穆伯穆伯生沃沃生野
八世孫天生杼為齊正卿云云又案僖廿八年傳有
齊崔夭蘇寬謂崔子祖父名不見經傳非也

世系所
云蓋見

世本

十一年經辰陵注潁川長平縣東南有辰亭 酈元曰

今此城在長平城西北長平城在東南或杜氏不謬

傳寫之誤耳

傳令尹薦艾獵城沂 服杜皆云薦賈之子孫教案世

本艾獵為叔敖之兄又孫叔敖碑云君名饒字叔敖

以艾獵為叔敖名此服杜臆說世本是也

襄十五年傳為子馮

為大司馬注云叔敖從子案世本馮是艾獵之子此明文可據者正義曲說又以為世本轉寫之誤非也

使封人慮事注慮謀慮計功 顧氏補正云慮籌度也

解非棟案大司馬職云大役與慮事屬其植先鄭亦謂謀慮其事服虔曰封人司徒之屬官

因縣陳 廣韻縣郡縣也釋名曰縣懸也懸于郡也古作寰楚莊王滅陳為縣縣名自此始也家君曰縣不見周官似非自楚莊王始然古文作寰亦非無本而說文無寰字似縣即寰也集韻云寰通作縣

吾儕小人 說文曰儕等輩也鄭康成曰儕猶輩類

謂之夏州 子惠子曰服虔曰言取討夏徵舒之州車

武子撰桓溫集云夏口城上數里有州名夏州盛宏
之荊州記曰史記蘇秦說楚威王東有夏州今江陵
夏口城有州名夏州

十二年傳卜臨于大宮且巷出車吉 賈逵曰臨哭也
巷出車陳于巷衛示雖困不降必欲戰也案下鄭復
脩城則賈說良是

甲寅克之 時鄭石制為內間故楚得以克鄭

至于達路注塗竝九軌曰達 詩正義曰尔足九達謂

之達周禮經塗九軌不名曰達杜意蓋以鄭之城內不應有九出之道故以為竝九軌於外不合今杜注塗方九軌

兼弱攻昧武之善經也 周書武稱曰闕強攻弱而襲不正武之經也

筭路藍縷以啟山林 方言引作襜褕又啟作后說文曰襜謂之襜褕襜無緣也服虔曰言其縷藍藍然廣有一卒卒偏之兩 服虔曰左右廣各十五乘百人

為卒言廣有一卒為承也五十人為偏二十五人曰
兩廣既有一卒為承承有偏偏有兩故曰卒偏之兩
棟謹案禮說言杜氏據司馬法以釋偏兩之法司馬
穰苴齊湣王時人其所論兵法與周制異且與左氏
傳乖牾不合當从服虔之說

摩壘而還 鄭康成曰摩猶迫也軍壁曰壘

左射以蔽 服虔曰凡兵車之法射者在左御者在中

戈盾在右

御下兩馬 鄭康成引作柄徐仙民曰兩或作柄案此
則兩本柄字故服杜訓為飾古文省故作兩邵寶以
為掉兩馬之鞅非也

挑戰 李奇曰挑身獨戰不復須衆也挑音茶了反薛
瓚曰挑戰擿撓敵求戰古謂之致師

楚人乘我 賈逵國語注曰乘陵也陵亦侵也

養由基為右 高誘戰國策注云養姓由基名楚之善
射人也

潘黨望其塵 孫子曰塵高而銳者車來也

使潘黨率游闕四十乘注游車補闕者 棟案游闕游車闕車也外傳曰戎車待游車之裂周禮車僕有闕車之倅

駒伯注郤克 棟案郤錡字駒伯克之子也大夫門子得从父于軍鄢陵之戰范匄從文子於軍此其證也屈蕩戶之 錢謚益曰家藏淳熙九經及長平游御史本中箱本俱作戶字棟案淳熙正義以作戶也

楚人碁之注碁教 說文引云楚人昇之云舉也黃顥
說廣車陷楚人為舉之案此則碁當作昇傳遜謂楚
人將毒害之而晉人乃脫扃拔旆投衡而出非也詳
見定四年訓碁為教蓋本小尔疋

趙叟在後 叟與叟同見無極山碑說文作零云零或
作叟

知莊子 案世本晉大夫逝遨生桓伯林父及莊子首
本姓荀自林父將中行世本以為荀偃別為中行氏知邑名

括地志云故智城在蒲州虞鄉縣西北四十里古今地名云解縣有智城蓋謂此也博物志云河東解縣有智邑

每射抽矢敢注敢好箭 案既夕禮云御以蒲敢鄭注云蒲敢牡蒲莖也古文敢作駟賈公彥云據左氏傳蒲非直得策馬亦為矢幹漢書鼂錯傳云材官駟發矢道同的如淳曰駟矢也小顏曰駟謂善矢也左氏傳作敢字其音同耳則知古敢字作駟

屢豐年 案說文無屢字當从毛詩作婁漢書皆以婁為屢今毛詩亦有作屢者俗作之

取其鯨鯢 說文引作鯨鯢云海大魚也从京漢書薛宣傳曰古者明王伐不敬取其鯨鯢小顏曰鯨古鯨字汗簡云鯨古作鯢出馬日碑集羣玉古文古京字讀為𩺰

歸于怙亂者也夫 子惠子曰王荊公新經詩義本此十四年傳衛人以為成勞復室其子 周禮司勲云事

功曰勞室祿也周書有一室之祿謂祿其子襲父位
自一室至千室卿之祿也周禮謂之宅田注謂以女
妻之非是世本曰莊叔達生得閭叔穀穀生成叔爰
鉏鉏生項叔羅羅生昭叔起起生文叔圉圉生悝其
謂得閭叔穀也

屢及於室皇 高誘呂覽注引此傳作經皇與莊十九
年經皇一也

蒲胥之市 呂覽作蒲疏胥疏古字通

十五年傳高下在心 服虔曰高下猶曲申也

國君含垢 淮南子云老子曰能受國之垢是為社稷

主

使解揚如宋 劉向曰解揚霍人字子虎後世言霍虎

登諸樓車 服虔曰樓車所以窺望敵軍兵法所謂雲

梯也

使華元登子反之牀注兵法因其鄉人而用之必先知

其守將左右謁者門者舍人之姓名因而利道之

案此注皆見孫子用間篇曹公孫子注曰因敵鄉人知敵表裏虛實之情故舊而用之可使伺候守有官職在者謁告也上告事者也門者守門者也舍人守舍之人也又先知為親舊有急即呼之則不何止亦因以之知敵情

虐我伯姬 上云酈舒為政而殺之

王符引作虐

此云虐者

案尚書呂刑惟作五虐之刑墨子引作五殺之刑論語不教而殺謂之虐又十八年傳云凡自內虐其君

曰弑皆以虐為殺也

論語陰騭曰庚子之旦金版尅書出地庭中曰臣族虐王禽

宋均云謂殺闕龍之後庚子旦庭中地有此版異也龍同姓稱族五虐殺我必見禽也是虐為殺又一證

敗赤狄于曲梁

注云廣平曲梁縣迴遠非也劉昭案

上黨記曰潞濁漳也縣城臨潞晉荀林父伐曲梁在

城西十里今名石梁此傳潞字漢書作路

劉寬碑陰潞作路

案三體石經仍作潞說文同

羊舌職 宰相世系表曰晉武公子伯僑生文文生突

羊舌大夫也突生職職五子赤肸鮒虎季夙

十六年傳禹稱善人 玉篇引云禹稱善人云與稱同
介足曰稱舉也與杜訓同當从人

十七年傳晉師還 家君曰晉未嘗出師而云晉師還
者豈斷道討貳之師歟似有關文

十八年傳自虐其君 唐石經云自內虐其君案正義
同今本皆脫內字

袒括髮 士喪禮曰主人髻髮袒鄭注云古文髻作括
是括為古文髻也

春秋左傳補註卷二